

東北問題研究會叢書

國難文學

第二編

吳貫因編  
胡適題

# 東北問題研究會出版書目

國難痛史第一卷	壹元
國難痛史第二卷	壹元
國難痛史第三卷	壹元
國難痛史第四卷	壹元
國難痛史第五卷	壹元
國難痛史第六卷	壹元
華英對照九一八後中國東北現勢圖	壹圓
中日條約彙纂	壹圓
日本各方對於脫盟	捌角
國難須知	陸角
日本參謀本部滿蒙國防計劃意見書	伍角
倭製滿洲國	伍角
東北與日本法的關係	伍角
九一八事變後日本鐵蹄下之東北鐵路	叁角
中國發展東北之努力	叁角
九一八事變真相	叁角
平津至山海關各國駐兵問題之研究	叁角
東北袖珍統計(再版中)	貳角
國難文學	貳角
中俄協定伯利議定書	貳角
東三省果爲日本之生命線耶	壹元伍角
日本併吞滿蒙之秘密計劃	壹元壹角
日本欺詐外交	壹元壹角
新法鐵路中日往復照會	壹元壹角
中日鐵路關係各問題	壹元壹角
日本軍閥藉口皇謨實行侵略政策之真相	壹元壹角
日本利用匪首凌印清擾亂東北實錄(再版中)	壹元壹角
東北輿圖日曆	壹元壹角
東北現勢圖	伍角
熱河全圖	貳角

總代售處 北平西城府右街運料門內中海寶光門外交月報社經理部

分代售處 北平中華，新生命，現代，佩文齋，聯合，歧山，新華，華盛，景華，新智，朔風等各書局，及天津上海大公報代辦部

郵票代價不折不扣但以一角以下者爲限

## 自序

去歲敵燄鴟張，余纂國難文學第一編，企借文字之力，以蘇垂死之人心，庶幾一致奮興，共救此將亡之國；今距第一編刊行時，又一載矣。此一載中，熱河淪陷，河北之東北部，又被禁止駐兵，燕雲十六州，行將隨東北俱盡，國勢阽危，江河日下，欲求回復一年以前之狀態，且不可得，觀茲國運，能不驚心動魄乎！其最可駭者，則國民之品性，竟隨國難而愈趨愈下，奸人則利用國難，以媚敵求榮，如灤東西之發生無數虎俵偽軍，其明証也。軍閥則利用國難，以攘奪地盤，如察哈爾之新添無數雜牌軍隊，其明証也。民德墮落，至於此極，即強敵不來，求國不亡，亦豈可

得？吾爲此懼，私念欲挽回頹勢，莫亟於培養國民之品性，爰有國難文學第二編之編纂，冀以哀痛之音，促同胞之自省，國人之天良未汨沒者，得此奮興劑，或能淬勵品性，以求自拯而並以拯國乎？易曰，「其亡其亡，繫於苞桑」，余念茲在茲，常日存之，海內愛國君子，其以余言爲何如也？

民國二十二年八月廿三日吳貫因序於北平

# 國難文學二編目錄

## 七律

塞外

時人 漂泊生

哀江南首六

時人 令威

壇坫慨國聯也

時人 冷、愈

壬瓊島登高感槍東北連抗日戰爭

時人 吳貫因

## 七絕

傀儡詠首七

時人 周詠雱

國難吟首九

時人 戴子平

去年國難多首六

時人 漂泊生

時事竹枝詞

時人

易簣時示兒

宋陸游

## 七古

### 目錄

465367

弔榆關陣亡將士

時 吳貫因

哀熱河

時 陽岐生

苦熱行

時 澄園

老婦

時 下里巴人

撲滿子

時 陽岐生

虎乳子

時 周澤南

屠撫順

時 周澤南

爭癸酉

周澤南

戰淞滬

周澤南

今樂府（梁作友）

時 陶在東

海上捷

時 常晉

亡國歌

朝鮮 李口口  
遺老

戰太倉

時 陳柱尊

為張君東莞人傑紀念錄  
子幹題

清 邱逢甲

易水懷古

清 徐銘慶

五律

時事

塞上曲

### 五古

關山月

婦夜哭

石壕吏

木蘭詞

### 詞

八聲甘州私題秣陵悲秋圖

目

錄

人時  
味辛

劉潛夫

南還別陳翼成總戎

春望

明  
袁崇煥

唐  
杜甫

人時  
陽岐生

十八十九謠

人時  
瞻廬

人時  
朱謨

正氣歌

宋  
文天祥

唐  
杜甫

後出塞

唐  
杜甫

無名氏或云木蘭作

人時  
沈長公

摸魚兒信陽軍中送伯駒

人時  
宛乘

三

國難文學

四

水龍吟

時人趣園詩餘

念奴嬌 游西湖

時人熊希齡

念奴嬌 過吳淞弔抗日將士

時人八閩蕩子

曲

萬古愁

明歸莊 明亡後野服隱居不仕

賦

大哀篇

明人此賦十三歲時作明亡後殉國

夏完淳

哀江南賦

梁廈信

書

復攝政睿親王書

明史可法

拒馬士英書

序

張中丞傳後序

唐韓愈



# 七律

## 塞外

塞外嚴冬戰未停。松花江畔血風腥。枕戈壯士猶飢餒，絕援孤軍  
半死生。滿地白霜侵白骨。彌天流彈似流星。請君側耳長城外。  
細聽敵機轟炸聲！

## 哀江南

令威

雨雲翻覆黯烽烟。慘黷神臯二十年。白水無人光赤帝。黃巾滿地  
死蒼天。毀巢鴟吻秋風厲。曠野狐鳴火燄圓。爭說金陵形勢壯。  
斷流兵又起符堅。

草草崇朝獲十禽。王良詭遇一時欽。蛙生胥井窺天小。鼠穴陳倉



蓄土深。戚里大封憐碧玉。吏門如市輦黃金。清廉跼蹐隨夷溷。何處能芟惡木陰。

百計搜牢虎政苛。三吳財府半銷磨。公庭狼藉錐刀競。法令牛毛盜賊多。悍將羽書橫索饜。流民圖畫避追科。鄧家私庫財應益。萬億京鈔市價訛。

門楣真倚女兒光。呂雉樊須姊妹行。不惜桑中贈芍藥。便容天下棄糟糠。春衙給事參紅粉。錦市招搖鬪冶妝。翻笑秋河牛女隔。未妨行露濕衣裳。

吳沼當時禍覺開。於今又聳越王台。三年鈇鉞餘威在。十郡壺漿揖盜來。白袷機雲文物盡。烏衣王謝故家摧。勳祠神社都夷毀。

頗見平民陵闕鬼。

由來朋黨亂蓬麻。季漢衰唐有覆車。偶語酷於秦尉律。大言翻却魯儒家。河山儼峙東西帝。城野徒証內外蛇。留得江南生一線。請拋戈甲惜蟲沙。

### 壇坫 慨國聯也

冷 盦

壇坫聲名占上頭。欲將盟會續春秋。三章約法羣雄共。萬國英才四座稠。竟使高文成廢紙。不聞砥柱障橫流。但尊齊楚輕勝薛。今昔原來貉一邱。

等閒作計故蹉跎。聚訟空勞幾度過。談虎有時齊變色。屠鯨無力懼翻波。陰謀捭闔從茲見。輿論紛紜奈若何。火勢燎原看已迫。

可憐兩字尙調和。

壬申瓊島登高感愴東北連日抗日戰事

拈韻得雲字

吳貫因

驚看遼海起風雲。噩耗頻傳不忍聞。國破哀天猶夢夢。悲來逼我欲云云。波涵塔影浮三面，柳拂秋光剩幾分。肯令長蛇東荐食。請纓直欲繼終軍。

### 邊中送別

明袁崇煥

五載離家別路悠。送君寒浸寶刀頭。欲知肺腑同生死。何用安危問去留，策杖祇因圖雪恥。橫戈原不爲封侯。故園親侶如相問。愧我邊塵尙未收。

### 偕諸將游海島

明袁崇煥

戰守逶迤不自由。偏因勝地重深愁。榮華我已知莊夢。忠憤人將  
謂杞憂。邊釁久開終是定。室戈方操幾時休。片雲孤月應腸斷。  
椿樹凋零又一秋。

### 岳墳

元趙子昂

岳王墳上草離離。秋色荒涼石獸西。南渡君臣輕社稷。中原父老  
望旌旗。英雄已死嗟何及。天下中分遂不支。莫向西湖歌此曲。  
水光山色不勝悲。

## 七絕

### 傀儡詠

周詠雱

無端倭騎徧東陞。城郭人民盡可悲。鼎僭大同成底事。僞朝猶託

漢官儀。

傀儡登場不自羞。那堪回首望神州。江南血戰征人苦。何物羣奸尙狗偷。

狐媚猶矜貨可居。覺羅鬼餒又何如。寧忘二十年前事。悽絕韓王下禪書。

薇蕨西山應愴神。僞朝佐命亦斯人。不聞遺老吞聲哭。尙有文章續美新。

承疇一念較如何。絕塞重操反日戈。惜取將軍好名節。歎江橋畔血花多。

居然歌舞頌明良。玉樹庭花總斷腸。借問專房誰擅寵。趙家飛燕

謝秋孃。

邊軍已下金牌詔。諸將都從壁上觀。如此江山嗟自誤。九州無鐵鑄神奸。

### 國難吟

戴子平

#### (一) 寇深矣

朔風獵獵陣雲開。破碎河山贖却灰。萬里長城失屏蔽。奴倭鐵騎入關來。

#### (二) 可憐焦土

塞上風高落日斜。臨榆城外寇如麻。砲轟機炸餘焦土。太息邊疆百萬家。

(三) 熱河棄守 按報載湯氏棄熱時，城內安靜異常。行宮麋鹿，仍恬然嚙草。又湯氏近月得中央協濟四五十萬元，部下仍極受苛待。  
壯士枕戈苦守邊。食萍麋鹿亦恬然。如何手握軍符者。不愛國疆只愛錢。

(四) 哀國聯

調停兩字幾遷延。東亞和平乞國聯。協約於今成畫餅。始知公理輸強權。

(五) 慰義軍敗績

松花江畔血空流。殺敵也曾震五洲。棋到局終爭一著。請纓壯志未應休。

(六) 悼陣亡將士



百戰捐軀血濺紅。西風灑淚哭英雄。九原此日應瞑目。死到沙場是善終。

(七) 喜峯口却敵

聯翩諸將護舊都，十萬健兒勢豈孤。惟有冠軍宋卿子。喜峯口下破強胡。

(八) 大軍北上「抗日」

火急軍符萬里餘。飛機坦克護儲胥。紛紛征調半天下。佇看長城報捷書。

(九) 團結禦侮

方今倭寇逞強日。正是男兒報國時。大局轉移齊努力。勛名贏得

口皆碑。

## 去年國難多

### (一) 淞滬撤兵

淞滬撤兵可奈何，敵軍高唱凱旋歌。江南戰迹誰憑弔。最是去年國難多。

### (二) 失地不收

失地不收做什麼。胡行亂走犢旋磨。滿洲傀儡成敵國。最是去年國難多。

### (三) 國際聯盟

國際聯盟穴惡魔。急來抱佛始親俄。外交失敗談何益。最是去年

國難多。

(四) 一髮千鈞

一髮千鈞是熱河。出師禦敵尙蹉跎。殘山賸水無顏色。最是去年國難多。

(五) 粵東龍蛇

東粵龍蛇戰方過。山東又起惡風波。繁華東魯成灰燼。最是去年國難多。

(六) 兄弟鬩牆

兄弟鬩牆未止戈。岷江南北不平和。生靈何罪遭荼毒。最是去年國難多。

時事竹枝詞

老靠人家不值錢。誇稱四億劇堪憐。救星朝著東方拜。不是蘇聯便國聯。

易簣時示兒

宋陸游

死去方知萬事空。但悲不見九州同。王師北定中原日。家祭無忘告乃翁。

七古

弔榆關陣亡將士 廿二年春

吳貫因

封豕長蛇東荐食。白山黑水變顏色。巖疆守土竟無人。蒿日時艱長太息。城門失火殃池魚。又見榆關馳羽書。滿地烽烟胡馬至。

長城天險果何如。現代戰爭憑利器。硝烟彈雨安能避。亦知百事不如人。只冀三軍明大義。天生大勇安將軍。膽儷子龍真不羣。白戰身雖存寸鐵。不肯回戈避敵氛。身許國家守巖疆。孤城誓與共存亡。灑將碧血塗青史。捐得微軀爲國殤。人生自古誰無死。正寢疾終良可恥。暴骨沙場報國恩。光芒眞與日星比。嘗胆臥薪是此時。祖生舞劍夜聞雞。申胥七日能存楚。曹沫三劍終報齊。石河東望寇氛逼。後死同胞應努力。何人不可繼汪錡。共執干戈衛社稷。請纓投筆援桴鼓。修我戈矛復我土。指日義師東渡遼。飛觴痛飲黃龍府。

## 新樂府

哀熱河

熱河九門之屏藩。委之而去同榆關。悵望燕雲一洒淚。何人請劍不生還。舉國盼復封疆地。棘門霸上眞兒戲。宣言誓死湯玉麟。忽然賣國吳三桂。二百餘車載財賄。鴻飛冥冥逃遠矣。讓苴撲表稱將材。諸葛斬馬肅軍紀。步步退讓誰之咎。幾曾痛飲黃龍酒。三分天下一分亡。未聞將軍議戰守。國民滿腹騰疑團。握掌透爪哭國疆。願將照胆秦宮鏡。往照執政何心肝。

苦熱行

澄園

豫南荆北多山水。雨不愆期四民喜。今夏一旱逾月餘。烈日燒空炎飆起。妖氛遍野待廓清。悵余從軍三千里。久居邊塞耐歲寒。

溽暑鬱蒸難嚮邇。蓮幕高張袁家樓。軍書旁午夜未已。不因人熱  
恥趨炎。汗流浹背胡爲耳。日裏風餐覓樹陰。夜間露宿傍營壘。  
五內如焚廢食眠。安得山林遠城市。調冰雪藕分無緣。熱毒侵人  
入肌理。沸粒如雲汗如雨。渾身點綴珊瑚藥。心煩技癢芒刺背。  
輾轉兼旬亦苦矣。苦病未如苦熱多。天下苦人將何似。赤燄南侵  
紅日東。滔滔誰是憂天杞。勞農天下盡胼胝。戰士軍前半生死。  
余有池院足盤桓。余有屋榻可樓止。惟覺日長如小年。朝夕埋頭  
鑽故紙。澄懷淨滌熱中腸。避暑山莊近在此。遄征徂暑汗馬勞。  
客裏光陰一彈指。新涼一味詠秋來。風物萼鱸故鄉美。苦熱聊爲  
苦戰吟。敢謂杜陵是詩史。

老婦

老婦高年七十七。家近長城薊縣北。龍鍾扶杖出家門。隨從纍纍孫若媳。大小人人手挽筐。滿筐盡是農家物。一路欣欣往前行，不往西南往東北。東北揚塵起彈聲。奔來一隊呢服兵。馬蹄疾疾兵必喝。驚倒阿婆七歲孫。老穉相扶趨路側。詫看兵馬去紛紛。兵馬隊中有珍物。兵馬隊中有貴人。貴人避險走南方。老婦舉家向戰場。人道此家逃難急。行程有誤緣心慌。老婦自言神智爽。槍聲近處再商量。不問阿兒兄弟掘壕處。但問殘傷戰士何處藏。何處藏。小村坊。鋸臂斷股除腐骨。牽腸破腹取彈丸。貴人重保身外物。戰士不辭四體傷。痛徹骨。聲悽愴。聲聲未有怨尤意。



只愁英勇不復見疆場。熱血灑。怎報償。報償不重金和帛。但願  
失地收回不再失。怎奈長期抵抗托空言。坐看三省淪亡又承德。  
冠燄轉眼沒長城。鉅公安閒小民急。掘戰壕，輸糧食。但得協助  
英勇抗日軍。蹈險傾家非所惜。情可感。志可激，感激最是高年  
婦。白髮蒼蒼覓到傷兵處。傷兵滿室復盈廊。反側呻吟聲振屋。  
戰士疆場不顧身。身殘未喪轉思親。思親遠隔千百里。仰念爺娘  
俯兒女。俯仰遐思想親容。不想當前有慈母。慈母千般愛子情。  
老婦一人集大成。集成不僅家常用。用愛民族慰傷兵。俯身倚徧  
傷兵榻。一一撫摩分贈物。『雞子自家母雞生。手巾自家媳婦織  
。區區不是外洋貨。安心受用毋羞澀。』藹然振撼健兒心。羣呼

「阿母」感且泣。二十二年四月二十三日南昌

### 撲滿子

陽岐生

撲滿子。腰纏肥。大腹便便數十圍。口吸金錢甘如飴。牀頭玩弄  
驕兒妻。一朝打碎成塵灰。絕不憐愛拋污泥。世間何物不堪爲。  
汝乃愚昧蹈危機。書空咄咄心悵惘。追悔當年作撲滿。後車之鑑  
前車覆。貪夫從此速自悟。撲滿能得幾時固。

### 虎乳子

周澤南

嘉上海女學生軍。慷慨救國難也，上海女學生五百餘人，  
組織女學生義勇軍，各執大刀一柄，手槍一枝，於本年一  
月十五日出發，十八日抵熱河開魯前線，參加抗日軍中作

戰，士氣大振！

長白山前逢乳虎。爪裂倭虜旋風舞。口銜國徽耀威武。虎子名曰  
中華國。呱呱墮地遭凌虐。千災百難襁褓中。鄰家嗾犬爭來撲。  
慈母愛子忘其身。勃然奮挺撻東鄰。五百死士田橫島。千金匕首  
徐夫人。荆家姊妹十三娘。慷慨悲歌赴敵場。擊楫渡江離上海。  
拳旗斬將戰遼陽。不有此母無此子。世間男兒羞愧死。虎子壯。  
報母恩 祝慈母壽億萬年

### 屠撫順

周澤南 民國二十二年一二八  
國耻紀念日作於南昌

屠撫順 紀倭虜慘無人道，較黃巢張李爲尤烈，事急寇深，  
禍迫眉睫，促政府與國民，速備戰具，嚴國防也。

倭兵昨日屠撫順。三千農民同畢命。粟子溝。千金堡。平頂山。村民老幼無生還。內中逃出一男子。渾身碧血哽咽語。日本拂曉入我村。齊迫村衆隨兵行。老母足病不能步。鞭撻強使我背負。母子驅至小山邊。村衆團伏高層層。機關槍下嘲攝影。（註一）面面相覷命俄頃。四面槍聲驟雨發。抱頭號哭遭屠殺。老母中彈倒我身。宛轉慘死血泊中。忽聞韓人呼歷歷。日兵已去可起立。倉皇奔逃踉蹌起。二次槍聲又作矣。其中間有傷稍輕。重罹白刃斷殘生。男女盡斃前山下。屍橫滿地血如瀉。白頭老子沒個存。黃口小兒無免者。我時僵臥母血沐。認爲已死未觸目。風淒月黑匍匐歸。十里猛火燒家屋。何年事。何時日。民國紀元二十一。

十一月二十一。三千同胞殉國日。天蒼蒼。黑茫茫。大仇未報血不乾。朝夕泣血呼阿娘。願我政府籌國防。同執干戈護國疆。曠日大戰作國殤。毋令我輩束手亡。

（註一）日兵迫三千農民集於山下，指機關槍嘲笑曰，此照相機也，與你們攝影。

## 爭癸酉

周澤南 民國二十二年一二八  
國耻紀念日作於南昌

紀倭虜圖滅亡吾國之日急也，本年元旦，日本陸相荒木貞夫，發表宣言，其文曰，『乾坤一新，無限之希望，與高遠之理想，齊燿之昭和八年癸酉之歲，干支之酉，配以月次，則爲五月，滅支那，霸大陸，皇國飛躍之靈兆』云云

，今事勢危險萬分，伏願同胞讀此，知所悚懼，急急內爭，團結救國。

寇深矣。若之何。國民春夢莫婆婆。倭兵已占山海關。飲馬黃河指顧間。軍艦橫江聯蜀道。飛機盤空瞰鍾山。君今且緩進椒酒。獻君警告拜稽首。問君何以制驕虜。『昭和八年歲癸酉。酉以五月配干支。此月併吞支那時。乾坤一新霸大陸。皇國靈光飛躍如。』驚心赤耳憤且懼。萬里長城我安恃。內戰真成鷓蚌持。外交倚賴模稜具。息內爭。禦外侮。全國動員鳴戰鼓。彼癸酉。我，癸酉。大家齊顯好身手。誰曲誰直誰戎首。誰揚國威誰露醜。鐵血之下拚一睹。

# 戰淞滬

紀一二八事變美十九路軍能禦侮救國也，

周澤南

「寧爲槍下鬼。莫作亡國奴。」（註一）此語可抵金浮屠。十九路軍戰淞滬。三萬壯士齊大呼。倭人一聞便喪氣。十度接觸十敗潰。敵所恃者武器良。又恃租界狡兔藏。鋼軍屹然立戰場。（註二）神出鬼沒威堂堂。雄劍風雷生馬上。陰符韜略效鷹揚。機轟砲炸山川動。鋼軍談笑拒前陣。龍拿虎擲四十日。敵人連易四司令。陸海空增十萬兵。鋼軍後方無補充。衆寡不敵勢懸絕。全師而退仍從容。雖敗猶榮戰已力。何況彰彰非戰罪。山河萬古記功勳。日月經天扶正氣。世界傳流好姓名。國民崇拜大英雄。有口皆碑雙猛士。買絲爭繡二將軍。宋岳飛。唐郭李。蔣蔡前後堪媲美。

。瀋陽父老望旌旗。行見將軍投袂起。

（註一）寧爲槍下鬼，莫作亡國奴二語，乃十九路軍翁照垣旅長，勗勉將士口號，見時代公論雜誌。

（註二）世稱十九路軍爲鋼軍。

今樂府（梁作友）

三千萬。梁作友。聲言已財產。報效爲國有。幾成辦實業。幾成助國防。幾成供教育。用途堂哉皇。同時玻拉兩國正開仗。拉有商人哈斯翰。一捐飛機三百架。更加美金幾萬鎊。白人愛國何等樣。你有哈。我有梁。東西並世生瑜亮。愛國人詎分白黃。報紙拚命爲宣揚。邦人盼禱祝馨香。今日走南京。明日飛漢口。像煞



有介事。翹望久之。但聞南京旅館買脫空。二百餘元未到手。吁嗟乎。三千萬。梁作友。

## 海上捷

常 晉

鹿島蝦夷伐鼉鼓。又報倭奴來歇浦。縱橫東北若無人。瀉瀆彈丸容易與。君不見，空軍之伯海軍王，陸軍況復猛如虎。巨砲震如雷。睡獅眼乍開。誰跨其背任指揮。蔣侯光龔蔡侯廷楷好將才。一戰再戰。強敵胆摧。轟炸機聞雷而擊落。飛雷艦率隊而循回。步兵俘虜人作堆。一笑島夷不中用。帝國雄風安在哉。勇矣乎！勞師襲遠既若彼。以逸待勞乃如此。救國皆由抵抗來。寄語同胞毋畏死。復國讎。雪國耻。纔是漢族奇男子。

## 亡國歌

李口口

這首歌辭是朝鮮遺老李某的作品，他將亡國的慘痛寫得淒涼悲壯；我們現在國如纍卵，快要嘗着亡國的滋味，且聽他過來人的話吧！

小樓一角秋江雨。遺老吞聲哭且數。我是漢城宮裏人。淒涼閱盡興亡苦。苦憶前塵涕淚潛。南唐一闋念家山。兩朝舊事向誰訴。萬里孤臣有夢還。憶昔入宮正年少。處階四平景星曜。驢背長隨聖駕遊。貂冠時近龍顏笑。君王晚歲善琵琶。檀槽哀思勝悲笳。彈將胡地三邊曲。落盡西宮一夜花。有時含憤裂弦起。痛說前朝興亡史。願爲老臣念汝哉。世間萬事只如此。即今昌德宮烟繞。

等是銅駝洛陽道。難免金仙辭漢闕。念着玉殿埋秋草。君王言罷  
淚浪浪。撥動鷓鴣弦南內涼。即今一一成懺語。字字思來總斷腸。  
腸斷鼎湖去國年。六龍哭送萬人喧。茂陵甲帳來松鼠。碧殿金棺  
啼杜鵑。于時昌邑迎東北。主人西來稱監國。國事可憐日漸非。  
東海巨浪排空飛。東海有國如虎熊。雄心常欲吞諸姬。會黨方軍  
望漢鼎。和戎已誤進胡兒。大鳥方去井上來。使臣統監德哀堪。  
朕命不知何日盡。國魂欲斷幾回催。偏有椒房妄拆軛。外蒙推勢  
傾宮掖。遂使長秋宮月明。冷照血花千年碧。金門八月夜三更。  
千乘倭兒鐵騎鳴。寢殿刀光明玉几。錦屏血色暗球燈。傷心莫說  
宮中劫。皇后殉難皇子執。最是六家雲錦裳。拋殘黃土馬底踏。

不堪再過西苑路。長門寂寞鎖烟樹。惟有金籠鸚鵡鳴。聲聲皇后呼如故。從此宮嬪半零落。老奴誰不出宮閣。痛哭常因懷舊恩。漂流何意營新幕。緇衣披髮走江關。漢家宮闕怕回看。已脫離頭撞玉璽。又傳龍袞易南冠。一千四百十年秋。江漢帶血向西流。野哭千家盡蹈海。國傷五百正斷頭。悲來輒至先皇陵。整日長流淚不止。昨夜夢中見先皇。龍顏凄惻淚萬行。

### 戰太倉

陳柱尊

日本以傾國之師來攻，十九路軍因衆寡不敵，全師而退，而我政府尙不派精兵赴援，於是由南翔退嘉定，由嘉定退太倉，連日太倉大戰，勢甚岌岌，國人痛之，爰賦此詩。

三月十日退南翔。又嘉定。嘉定失。退太倉。援軍不來誰主張。衆口同聲言抵抗。朝議不定空周章。十九路軍雖勇士。肉身亦不殊尋常。縱能久戰不罷乏。豈能受彈不死傷。衆寡之數既懸絕。終令虎狼長驅入。焚炸虜掠言難詳。吳淞閘北成焦土。無辜被殺者六千強。尙有傷者二千亡者萬。（三月十七日報載上海社會局調查上海戰區死亡者逾六千人，傷者二千，失踪者萬人），若論財產更難量。大約計之約一十有六萬萬兩。就中尤以文化機關最遭殃。吳淞六大學。多爲瓦礫場。東方圖書商務館。古今書籍千萬箱。上者海內孤本傳自唐宋元明。近者來自東西洋。轟然一聲付灰燼。紙灰如鳥天空翔。不知何年得恢復。俯仰天地長慨慷。

差喜我軍戰皆捷。民氣一振柔皆剛。萬民慶祝紛未已。忽驚援絕急撤防。萬民痛哭頓足罵。誰實爲之謀不藏。援軍遲不來。來者非精良。派此區區塞衆口。遂令寇氛益猖狂。既禍淞滬又嘉定。由是崑山而太倉。所至轟炸無餘物。家家奔走成流亡。吳越神州之輿府。勢將一一化作無何有之鄉。空言抵抗不抵抗。（自東三省事起至今數月之久政府絕無抵抗準標）其禍真乃超洪荒。東南東北藩籬撤。小朝廷在長安長。（近中央已決籌備長安爲倍都）嗟哉小朝廷在長安長。千秋勛業歌蔣汪。（倍都之設，豈將放棄東南，爲東北之績，而黨國要人，偏安於倍都，乃爲長期抵抗邪。嗚呼。）

爲張君子幹題東莞人傑紀念錄

清 邱逢甲

榴花村人義旂起。梅蔚山下行朝峙。桓桓仗鉞熊將軍。落日光迴海雲紫。時先從祖判韶石。心共將軍表忠赤。嗟哉天水不復碧。熱血射天天爲白。由來胡運無百年。此鄉復出東莞伯。東莞山水天下奇。英雄屢見生於斯。天生英雄付劫運。尤傷心者袁督師。敵方用間朝不知。長城自壞甘人欺。朱明亡局決於此。何待粵中爭立時。北都破敗南都棄。三閩四廣成何事。君臣遺冢空殘碑。榴花橋畔啼鵲淚。爾伯爾侯蘇與張。張家兄弟不可當。蒼黃百戰野塘死。一死何止流螢光。人言東莞古聞邑。有人弔古編遺集。六百年來戰血涼。夜半靈旂鬼雄泣。鬼雄末造殊可哀。破碎山河

莫收拾。圓頭山人爾何幸。東南保障功名立。我愛英雄尤愛鄉。  
英雄況並能文章。手持鄉土英雄史。倚劍高歌南斗旁。

東莞在宋有熊飛，明有

袁崇煥，蘇冠生，張家玉，張家珍等皆死國難，詩中即詠諸人事

### 易水懷古

清 徐鎔慶

秦皇按劍吞諸侯。燕丹太子思報讐。荆卿慷慨以身殉。臨行更請  
將軍頭。將軍斷頭頭不落。背有人頭血漉漉。倒懸雙眼看荆軻。  
不到咸陽不瞑目。咸陽宮闕鬱崔嵬。列戟如山九殿開。一道白虹  
穿白日。荆軻含笑捧頭來。將軍頭對秦王面。督亢圖窮匕首見。  
此時秦皇手無劍。十萬貔貅不上殿。殿下負劍頻詔王。王却擊軻  
軻入創。匕首不利藥囊利。人術雖疏亦天意。嗚呼。天意帝秦不



可回。君不見漸離之築張良椎。

## 五律

時事

味辛

中原方用武。塞上又吹茄。紫海長翻浪。黃臺肯摘瓜。引狼誰誤國。騎虎我無家。和戰都非計。當年一念差。

## 南還別陳翼成總戎

明 袁崇煥

慷慨同讐日。間關百戰時。功高名主眷。心苦後人知。麋鹿還山便。麒麟繪閣宜。去留都莫訝。秋草正離離。

## 塞上曲

劉潛夫

叱馬過幽州。橫行北海頭。朔風喧露鼓。飛電激蛇矛。奮臂千

山振。英聲百戰留。天威揚萬里。不必侈封侯。

春望

唐杜甫

國破山河在。城春草木深。感時花濺淚。恨別鳥驚心。烽火連三月。家書抵萬金。白頭搔更短。渾欲不勝簪。

五古

關山月

陽歧生

古時一片月。高樓照思婦。今時一片月。荷槍軍中步。天下第一關。倭奴占未還。雙雙比翼鳥。飛落戰場間。夫婦枕雕戈。誓復舊山河。鼓琴增敵愾。舞劍起悲歌。翩翩芙蓉旗。駿馬龍駒肥。霜嚴朝斬將。風厲依突圍。戰罷同携手。繫馬營前柳。團圍天上

月。照飲黃龍酒。

## 十八十九謠

瞻 廬

國聯日代表松岡的松，依着解析幾何的方式便成爲十八公，現在被十九國特委會詰問他滿洲在中國主權下的是否問題，十八公弄得窘態畢現了！說是呢？說否呢？說一句論語的論調叫做「然，非歟」呢？說一句古文的論調叫做「唯唯，否否，不然，」呢？唉！十九委員難倒了十八公了！作十八十九謠：

釘頭碰鐵頭。十八遇十九。試問滿洲權。是否中國有。是則應曰是。否則答曰否。是否兩個字。重於鼎之九。東洋十八公。何以

答十九。推車已撞壁。捉襟又露肘。是字一出口。滿洲非彼有。自認侵略者。即此定戎首。否字一出口。膽便大如斗。與國聯宣戰。有此魄力否。無獨而有偶。古今兩十九。平原君適楚。從者一十九。國聯特委會。委員一十九。古之十九人。願決是與否。加入毛先生。二十勝十九。今之十九人。欲定是與否。有一矮先生。十八對十九。或是與或否。含糊不能久。一個矮十八。周旋長十九，十八與十九。誰勝又誰負。勝負縱有定。關外非我有？

婦夜哭

朱謨

有婦夜啻哭。哀聲震山谷。婦哭何悲傷。婦容何老禿。近婦前致詞。得勿傷孤獨。富貴等浮雲。財產何須蓄。婦一聞我言。其容

愈慙慙。哽咽始成聲。淚下如奔瀑。道有女與夫。三子口稱六。  
大兒從父耕。二兒抱書讀。小女浣衣裳。小子驅黃犢。終年不得  
飽。門多租吏逐。今歲忽構兵。中原橫逐鹿。一夕驚拉夫。大兒  
未歸宿。老父出門尋。瘦病填溝瀆。寒燈照影枯。慘色充茅屋。  
小兒日夜號。二兒事耕牧。奇禍從天來。一震山崩覆。不見兩兒  
還。牆頭留血肉。母女子遺身。焚香對天祝。但願大兒歸。垂老  
薄粟菽。聲聲鴻雁過。不傳兒書牘。彼蒼蒼者天。霜雪何肅肅。  
黃泉有兒夫。聚首願從速。舉頭望霄漢。雲滿星光沒。風揚燐火  
飛。蕭蕭響林木。

## 正氣歌

宋文天祥

天地有正氣。雜然賦流形。下則爲河獄。上則爲日星。於人曰浩然。沛乎塞蒼冥。皇路當清夷。含和吐明廷。時窮節乃見。一一垂丹青。在齊太史簡。在晉董狐筆。在秦張良椎。在漢蘇武節。爲嚴將軍頭。爲稽侍中血。爲張睢陽齒。爲顏常山舌。或爲遼東帽。清操厲冰雪。或爲出師表。鬼神泣壯烈。或爲渡江楫。慷慨吞胡羯。或爲擊賊笏。逆豎頭破裂。是氣所磅礴。凜冽萬古存。當其貫日月。生死何足論。地維賴以立。天柱賴以尊。三綱實繫命。道義爲之根。嗟予遘陽九。隸也實不力。楚囚纓其冠。傳車送窮北。鼎鑊甘如飴。求之不可得。陰方閩鬼火。春院闕天黑。牛驥同一皁。雞栖鳳凰食。一朝蒙霧露。分作溝中瘠。如此再寒暑

。百沴自辟易。哀哉沮洳場。爲我安樂國。豈有他繆巧。陰陽不能賊。顧此耿耿在。仰視浮雲白。悠悠我心憂。蒼天曷有極。哲人日已遠。典刑在宿昔。風簷展書讀。古遠照顏色。

### 石壕吏

唐 杜甫

暮投石壕村。有吏夜捉人。老翁踰牆走。老婦出門迎。吏呼一何怒。婦啼一何苦。聽婦前致辭。三男鄴城戍。一男附書至。二男新戰死。存者且偷生。死矣長已矣。室中更無人。惟有乳下孫。孫有母未去。出入無完裙。老嫗力雖衰。請從更夜歸。急應河陽役。猶得備晨炊。夜久語聲絕。如聞泣幽咽。天明登前途。獨與老翁別。

後出塞

唐 杜甫

男兒生世間。及壯當封侯。戰伐有功業。焉能守舊丘。召募赴薊門。軍動不可留。千金買馬鞍。百金買刀頭。閭里送我行。親戚擁道周。斑白居上列。酒酣進庶羞。少年別有贈。含笑看吳鉤。

木蘭辭

無名氏或云木蘭作

唧唧復唧唧。木蘭當戶織。不聞機杼聲。唯聞女歎息。問女何所思。問女何所憶。女亦無所思。女亦無所憶。昨夜見軍帖。可汗大點兵。軍書十二卷。卷卷有爺名。阿爺無大兒。本蘭無長兄。願爲市鞍馬。從此替爺征。東市買駿馬。西市買鞍韉。南市買轡頭。北市買長鞭。朝辭爺孃去。暮宿黃河邊。不聞爺孃喚女聲。



但聞黃河流水鳴濺濺。日辭黃河去。暮至黑水頭。不聞爺娘煥女  
聲。但聞燕山胡騎聲啾啾。萬里赴戎機。關山度若飛。朔氣傳金  
柝。寒光照鐵衣。將軍百戰死。壯士十年歸。歸來見天子。天子  
坐明堂。策勳十二轉。賞賜百千疆。可汗問所欲。木蘭不用尙書  
郎。願借明駝千里足。送兒還故鄉。爺娘聞女來。出郭相扶將。  
阿姊聞妹來。當戶理紅妝。小弟聞姊來。磨刀霍霍向豬羊。開我  
東閣門。坐我西間牀。脫我戰時袍。着我舊時裳。當窗理雲鬢。  
對鏡帖花黃。出門看火伴。火伴皆驚忙。同行十二年。不知木蘭  
是女郎。雄兔脚撲朔。雌兔眼迷。雙兔傍地走。安能辨我是雄雌。

## 詞

八聲甘州

沈長公

私題秣陵悲秋圖

忍重來白下。覩城陰幽燐綠星星。算國殤多少。大招誰賦。那不  
悲鳴。熱血流歸桃渡。紅浪冷凝冰。愁絕蛾眉影。隔岸峯青。之  
子而今已矣。想成仁取義。雙目能瞑。把生前恩怨。一例總銷平  
。祇難堪感懷今昔。對江山痛淚灑新亭。興亡恨。待傳奇手。絮  
與人聽。

摸魚兒

宛乘

信陽軍中送伯駒

最無慘初傾杯酒。西風又動離緒。忽忽執手長亭畔。我似長亭柳

樹。空凝佇。縱萬縷垂絲。難繫雙旌住。關山欲渡。待飛過黃河。  
。更隨殘月。同上劔門路。

消魂事。輸與江郎能賦。歸期依舊還阻。從軍王粲成何計。水驛  
山程無數。堪激楚。何況是彌天消息驚鼙鼓。離懷觸忤。看縹緲  
孤鴻。聯翩輕燕。掠水拓雲去。

### 水龍吟

趣園詩胎

可憐如此湖山。爲誰留得銷魂土。鄉關夢杳。郊原望遠。蒼茫雲  
樹。燕子樓頭。烏衣巷口。瀟瀟風雨。悵王孫嘶馬。怨春憔悴。  
空回首。江南路。忍聽聲聲鞞鼓。儘思量。斷腸何處。鯨波倒  
海。狼烟迷驛。音塵間阻。落絮縈情。孤芳搖影。夕陽無主。更

鶯花寂寞。庾愁侵髻。自吟哀賦。

念奴嬌

游西湖

熊希齡

雙峯殘照。看樓台爭聳。萬門千戶。太息東南民力盡。依舊湖山  
歌舞。遠聽江潮。胥濤怒吼。總爲私仇訴。獨餘孤柏巍巍。精忠  
千古。曾記勾踐君臣。臥薪嘗膽。忍力全疆土。絕代佳人能助國。  
愧殺男兒無數。敵勢方張。廷爭未息，又見金兵渡。國魂安在。  
域中今竟誰主。

念奴嬌

八閩蕩子

過吳淞弔抗日將士

西風斜日。望秋原亂塚。纍纍堆疊。抗日忠魂埋骨地。野草至今  
凝血。奮勇攘夷。成仁殉國。青史垂英烈。河山依舊。千秋憑弔  
豪傑。

遙想鏖戰當時。衝鋒肉搏。橫掃倭奴滅。砲火連天神鬼泣。骨肉  
紛飛刀折。午夜追兵。清霄襲擊。援斷孤軍絕。傷心無限。年年  
江水嗚咽。

## 曲

### 萬古愁

明諸生明亡後  
野服隱居不仕歸莊  
字玄恭

混沌元包。却被那老盤古無端囉唎。生刺刺捏兩丸金彈子。撮幾  
粒碎塵礫。云是鳥飛兔走。岳鎮也江湖。弄這虛聳。女禍氏僞斷甚

曲

四五

麼挂天鰲。有巢氏儻架甚麼避風巢。那不識字老庖犧。儻畫甚麼奇和偶。那不知味的老神農。儻嘗甚麼卉和草。更有那惹禍招非的老軒轅。儻彌天排下魚龍陣。匝地張成虎豹韜。豫留下萬古一把殺人刀。笑笑笑。笑那嘮叨置閨的老唐堯。何不把自己丹朱來教導。笑那虞廷受禪的女夫姚。終日裏。咨稷契。拜臯陶。命四岳。殺三苗。省方巡守遠遊遨。到頭來。只博得湘江兩淚悲新竹。衡岳枯骸葬野蒿。試向九嶷山前聽杜宇。一聲聲道不如歸去好。可憐那崇伯子股無毛。平水土。克勤勞。他家落得賢郎好。却不道轉眼兒。早被寒家小冪得頭標。更找一齣沒下稍的桀。禁死在南巢。小子履。真無道。聽一個老農夫。開口便把君王勦。只道

三宗學國能長久。七聖風流正可標。誰知道六百年夢一覺。冤家到不相饒。瑤臺萬燄青憐冷。紂首孤懸太白招。方信道因果難逃。仗黃鉞。陣雲高。逞鷹揚。血流漂。誰知道有室同鴟鴞。破斧興嘲。天顯揮刀。這一樁兒。早被商家笑。縱然有幹蠱的宣王。也救不得驪山一粲周宗燎。秦嬴半夜催兵到。泗濱頃刻淪神寶。試聽那悠悠行邁黍離歌。依稀似漸漸麥秀傷殷操。關中正氣豪。烏鵲歸巢。瑯琊碑鐫不盡秦宮號。綠雲鬢。粧不了阿房俏。童男女采采迭長生料。人魚膏照不見三泉燭。誰知那赤帝子斬蛇當道。重瞳興。邯鄲戈倒。軹道旁，嬰前導。若不是咸陽三月徹天紅。怎消得六王泉下心頭惱。更有那莽亭長。唱大風一套。便做

了漢家天子壓羣豪。更有那小秦王下殘棋幾道。便做了唐家天子擁神堯。還有那香孩兒結相知幾個。便向那陳橋古驛換黃袍。當日將相蕭曹。文學盧姚。共道是金甌無缺。玉燭長調。誰知那醜巨君摹榻下金滕稿。小曹瞞套寫定了山陽表。漁陽鼓驚破了霓裳調。碭山賊鑿開了九龍詔。五國城豫圖著雙昏趙。高亭山明欺那孤兒貌。試看那未央春老華清秋早。六陵梅杏。一抹子兔跡狐踪荒烟蔓草。何處覓前朝。那間有幾個狗偷鼠竊的權和操。有幾個馬前牛後的翁和媼。有幾個狼奔豕突的燕和趙。有幾個狗屠驢販的奴和盜。有幾個鼻唇缺舌的蠻和獠。亂紛紛一似螻蟻成橋。鴉鵲爭巢。蜂蝎跟濤。豚蜮隨潮。那裏有閒工夫記這些名和號。



惟有我大明太祖高皇帝。定鼎金陵早。驅貔虎禮英豪。東征西討。霧散烟消。將一片不見天日的山前山後。洗淨的風清月皎。將一番極齷齪不堪的胡言胡服。生劈開中華夷獠。真個是南衝瘴海標銅柱。北碎冰崖試寶刀。更可喜十七葉的聖子神孫。一葉葉垂裳問道。食旰衣宵。誰知道天地變。孽芽萌。風波鬧。生幾個剪毛。扶幾條短刀。不隄防衝破了峭岷道。望晴川櫓槍正搖。指燕雲旌旗正高。一霎時把二百七十年神京。生踹做妖狐淖。痛痛痛。痛那十七年聖天子。掩面煤山吊。痛那掌上珍的小公主。一劍向昭陽倒。痛那有令德的東宮。生砍做血蝦蟆。痛那無罪過的二王。竟做了一對開刀料。痛那受寶冊坐長信的懿安后。隻身兒

失陷在賊窩巢。恨只恨這些左班官。平日裏受皇恩。沾封誥。烏紗罩首。金帶橫腰。今日裏一個個稽首賊庭。還揣着幾篇兒勸進表。更有那叫做識字文人。還鈔幾句兒登極詔。那些不管事的蠢公侯。如羊如豕。多押在東城奧。夾拶著追金寶。姣滴滴的女嬌嬈。白日裏恣淫漂。俊翩翩的縉紳兒。多牽去做供奉龍陽料。更可恨九衢萬姓悲無主。三殿千官慶早朝。萬劫也難逃。沒一個建義旗下井陘的張天討。沒一個驅鐵騎渡黃河把賊胆搖。沒一個痛哭效楚包。沒一個灑淚新亭做晉導。沒一個擊江楫風湧怒濤高。沒一個舞雞鳴星淨月痕小。沒一個罵賊庭嚼舌似常山杲。沒一個守孤城碎首在睢陽廟。大多是鶴唳風聲豫遁逃。把青徐兗冀雙手

奉得早。金陵福王興。江南慧星照。誇定冊。推翊載。鐵券兒晃  
耀。招狐羣。樹狗黨。蟬蛄般嘹噪。那掌大的兩淮。供不得羣狼抄  
。便半壁的江南。也下不得諸公釣。反讓那晉劉淵做了。仗義的漢  
高皇。軍容素縞。可憐那猛軍將。做了絕救兵的李都尉。辮髮胡  
帽。兀的不悶殺人也麼哥。兀的不氣殺人也麼哥。尙欲奪天功。  
問秦淮渡口。把威權招。亂哄哄鬧一回。痴迷迷混幾朝。獻不迭  
歌喉舞腰。選不迭花容月貌。終日裏醉醅醕。御量千鍾少。沒來  
由羽書未達甘泉報。翠華先上了潼關道。一霎時南人胆搖。北人  
心驕。長江水臊。鍾山氣消。已不是大明年號。宮庭瓦礫拋。陵  
寢松揪倒。但聽得忽刺刺一天胡哨。車兒上滿載着瓊瑤。馬兒上

斜抱着妖嬈。打撞兒處處把脾氣臊。急得那砍不盡的蠻子。多一樣金錢鼠絲。紅纓狗帽。恨不得向大鼻子。把都門便做個親爹叫。俺再不向小朝廷拜獻降胡表。再不向錢神國告納通關鈔。再不向衆醉鄉跪進精渾醪。拔盡鼠狼毫。椎碎陳元寶。萬石君已絕交。楮先生告辭了。俺自向長林豐草。山坳水嶠。一曲伴漁樵。遇着那老衲子。參幾句禪機妙道。遇着那野道士。訪幾處蓬萊島。遇着那村農夫。唱幾曲田家樂。遇着那小乞兒。打一套蓮花落。悶來時登高山。攀絕頂。將我那愛百姓的先皇。洒幾行血淚。也把英靈弔。將我那莫祭祀的東宮。奠一盃清涼漿。和麥飯也澆。將我那死忠死節的先生們。千叩首萬叩首。合掌也高聲叫。春水

生。桃花笑。黃鸝鳴。竹影交。涼風吹纖纖。月色照寒袍。彤雲凝  
六花灼灼點霜豪。傍山腰水腰。望雲濤海濤。倚梅梢柳梢。聽鐘  
敲鼓敲。臥僧寮佛寮。任山高月高。沒些半愁半惱。真真是縱海  
魚。離籠鳥。翻身直透碧雲霄。恁便是銀青作餌。金柴爲綸。漫  
天匝地張羅釣。俺放蕩老先生。搖手擺手竟自去了。

## 賦

### 大哀篇

友人此賦十三歲  
時作明亡後殉國

夏完淳 字存古

粵以乙酉之年。壬午之月。玉鼎再虧。金陵不復。公私傾覆。天  
地崩離。託命牛衣。巢身蝸室。弔東幸之翠華。蒙塵軹道。望北  
來之浴鐵。飲馬姑蘇。申胥之七日依牆。秦庭何在？墨允之三年

采厥。周粟離餐。黃農虞夏。遐哉尙友之鄉。南北東西。渺矣容身之所。昔在士衡有辯亡之文。孝穆有歸梁之札。客兒飲恨於帝秦。子山傷心於哀亂。感悲家國。並見詞章。余始成童。便膺多難。揭竿報國。束髮從軍。朱雀戈船。蕭蕭長往。黃龍戰艦。茫茫不歸。兩鎮喪師。孤城潰版。三軍魚腹。雲橫歎浦之帆。一水狼煙。風動秦房之火。戎行星散。幕府鷓鴣。長劍短衣。未識從軍之樂。青燐蔓草。先悲行路之難。故國云亡。舊鄉已破。先君隕命。哭藥房於九淵。慈母披緇。隔祇園於百里。羈孤薄命。漂泊無家。萬里風塵。志存復楚。三秦壁壘。計失劉。蜀市子規。千山俱哭。吳江精衛。一水羣飛。哭海島之田橫。尙無其地。

葬平陵之翟義。未有其人。天晦地冥。久同泉下。日暮途遠。何  
意人間。魯酒楚歌。何能爲樂。吳歆越唱。祇令人悲。已矣何言  
。哀哉自悼。聊抒痛語。以寄鬱懷。嗚呼。黃旗紫蓋。雪戟霜矛  
。何以南朝天子。竟投大將之戈。北地胡兒。遂繫降王之組。豈  
高廟之警。十七世而旁移。孝陵之澤。三百年而終斬耶！此天時  
人事。可以疾首痛心者矣。國屯家難。瞻草木而撫膺。岳圯辰傾  
。覩山河而下淚。勞會言以達其情。窮人歌以誌其事。追原禍始  
。幾及千言。寄愁心於詩酒。阮籍窮途。結豪士於屠簫。張良倉  
海。後有作者。其重悲余志也夫。

詞曰。維昭代之代興也。乘土德而紹王。麗旭日而承天。迺執柄

以司命。聿嶽鎮而辰懸。掃旄頭以靜衛。鞭角端以定邊。窮叩筭  
。通浪元。朔方大出。南交凱旋。崇文會武。東鷲西鸛。閱兵則  
法高司馬。論都則賦雄孟堅。備禮樂於虎觀。絕烽火於狼煙。法  
不更而澤久。兵不耀而威宣。儷唐虞而比德。尙殷周而卜年。不  
意瑤輪無長炯之期。玉歷有中屯之會。天子端拱無爲。塞聰而治  
。羽獵灰五柞之塲。歌舞納三雲之地。震筵分枯苑之形。秦階起  
蜩蟻之異。議論廟謨。干戈兒戲。有道詠瞻烏而長歎。索靖指銅  
駝而下淚。山未頽而黯然。海不波而潛沸。然四極未虧。三倫不  
易。草木寒於北街。星日輝於南極。閭左多遊俠之徒。京華無攜  
棒之客。迨口口虎帳不朝。口口漁陽直入。遼水無聲。醫閭慘色



。毳帽氍裘之部。封豕長蛇之力。徒帳幕南。空羣漠北。中行之  
背未答。趙信之城再立。使我燕領龍韜。霜戈雪戟。出榆塞而草  
黃。墜犁天而雲黑。翻添月窟之哀。長有陰山之哭。於時五帥不  
歸。三城莫復。矢在背肩。口侵肘腋。元子所以傷心。江統於焉  
太息。且也朝堂多水火之爭。邊徼有沙蟲之戚。未拜郭隗。先誅  
李牧。熊羆夜而星淪。猿鷄秋而天覆。自蔽日之借叢。卒終星而  
喪國。繼以中常侍之竊政。大長秋之尸祝。聖嬈定中禁之謀。節  
讓起北宮之獄。顧厨禍酷於三君。纍若權延於五鹿。璿庭之璧月  
幾淪。虞淵之濯靈不浴。孤臣飲恨於屬鏤。碩士含辛而囊木。况夫  
疆場多事。邊境傳烽。恒落魚門之胄。空誇馬服之功。衛青未聞

其降虜。魏絳不見其和戎。庸邀漢馬。策賣盧龍。及夫星明少海。月浮天潢。殷丁河亳之志。周宣江漢之風。誅司隸之王甫。焚誣史之蔡邕。然兵由弱積。政以賄崇。敵篋不能止宣房之決。勺水不足息驪山之紅。見川之拔髮。鳴天山而掛弓。笳鼓震於遼陽。旌旗明於塞上。問九鼎之重輕。窺三川之保障。嘶風則首蓓千羣。臥野則駟駟萬帳。定遠非萬里之侯。驃姚無百戰之將。登陴而魚鑰倉皇。入援而龍旗震蕩。郅支絕口口之期。介子斷口口之望。衛丁零叛於東膠。毛修之亡於樂浪。非無刁斗之將軍。尙有綸巾之丞相。山鳴石鼓。宿動金精。三輔之萋蓬春牧。諸陵之弓劍宵驚。降將雲帆北渡。賢王寶馬東征。方將鴻雁集其安宅。鶯鶯奏

其昇平。列九賓而告廟。開八門而受寧。忽焉五斗米之教起。三里霧之術成。秦晉蜂攘。豫楚蟻營。中橫泗泗。南極湘荆。元帥給雲臺之仗。尙書開武庫之兵。或墨衰以蒞金革。或班劍以任鼓征。卒之黃巾黑犢之屯聚。青袍白馬之橫行。王曰叔父。君之寡兄。或嬰白刃。有結丹纓。赤社墮而青茅廢。靈光頽而茂苑傾。式虧國族。深軫宸情。祭通侯於太牢束帛。戍王人於揚水流薪。帝子沒而煙微南浦。王孫隕而草徧空城。盜長陵之杯土。傷神州之陸沉。彼何人斯。哀哉至今。矧夫上谷爲鞞鼓之塲。北海無龍蛇之陣。李都尉部曲忘歸。陸平原風流頓盡。歎而陵之道窮。絕龍城之宵遁。國門則畫策萬千。旌節則功勳尺寸。干城爲矛戟之

仇。醜毒是鹽梅之分。恒見恥於少卿之書。非所望於錢神之論。聖人勵玉衡而靡替。垂翠裘而獨悶。便殿空談。平臺屢問。賜金鑿則執政爲貴人之牢。望山頭則廷尉皆君子之吝。然主威雖上法武宣。臣德實遠慚廉藺。使臂逆而更振。養癰潰而莫吮。所以遼水東西。人多犯順。大河南北。野皆餓饉。黑山藉以益繁。赤眉聚而愈迅。遇王師如秋風之捲枯。下堅城若朝霜之悴菌。赤羽動而北馳。黃金鳴而西振。封函谷之一丸。據雍州之九郡。城郭胥淪。衣冠偕殞。犀兕有未贖之華元。丹青有不歸之于禁。旣度陝而叩關。復踰河而入晉。三千屬犀之騎。十萬迎風之刃。黃金臺之蔓草空哀。白玉杖之春采俱震。地圻天崩。海焦星隕。蚩尤之

毒霧彌天。軒轅之鼎湖虛殞。恨黃竹於千秋。悲蒼梧於一陶。椒宮爲血淚之湘君。鶴駕有呼魂之子晉。弔望帝以何期。矢叩闥而難進。可憐淚雨之昭陽。更有風塵之長信。桐棺墮馬鬣之封。柏路掩龍輻之轡。嗚呼。當斯時也。四海驚飛。三靈恫震。溘靈廳而大招。弔五雲而長恨。天上將軍之鐵馬呼風。宣陵孝子之布衣扶櫬。三百年王歷晝移。十六世金鋪夜燼。且也劉太尉留於薊北。瑯琊王渡於江陰。哭秦庭而歸虎穴。卜周鼎而陷龍潯。秣陵王氣。則黯然而欲盡。易水寒風。則悲哉正深。將軍之大樹北偃。胡虞之部曲西臨。假號子輿於城下。不立盧芳於雁門。借蚌鱗之利。逞獯獍之心。北關之樓臺雕謝。西山之松柏蕭森。太液翻而石

鯨慘淡。茂陵廢而盃消沉。瞻山河而隕涕。撫草木而沾襟。雖君  
仇之少雪。實國難之相尋。郿塢爲燃卓之地。漸臺興剽莽之軍。  
旣追風而西捷。遂射日以南侵。使南朝天子。北府大臣。烏衣則  
披綸揮羽。黃葛則懸膽臥薪。器成錯節。聖啓憂殷。祖士雅雍州  
出牧。劉奉春冒頓和親。組練餘腥者八百里。鮫皮犀屬者十萬人。  
庶幾佛狸無飲江之志。老罷成臥路之勳。而乃東昏侯之失德。  
蒼梧王之不君。玉兒寵金蓮之步。麗華長玉樹之淫。柏梁建章。  
則讀西京之趙鬼。臨春結綺。則號學士之孔嬪。吳歛越豔。魯酒梁  
樽。先見平玉杯象箸。復徵夫酒池肉林。問蛙鳴於爲官爲私。御  
龍衰於若亡若存。視江都而未武。擬長城而不文。冠蓋之銀青俱

滿。朝堂之銅臭相因。但知安石之賭墅。何止元規之避塵。楚囚  
無新亭之淚。越絕非石室之音。南徐之兵甲不勁。淝水之草木無  
神。拜蔣侯爲靈帝。弋白雁爲國賓。柱石則孔愉江總。閩外則祖  
約王敦。將相盡更始之羊胃。衣冠多南渡之雁民。宜其及矣。况  
有強鄰。於時清人河上之師。天寶通好之使。未許其冠帶春秋。  
遂至夫荆榛天地。蘇屬國之旌節終留。庾開府之江關永棄。移貂  
帳之千里。逐龍駒之萬騎。投鞭則淮水不流。飲馬則長江無際。  
白羽死夫孔明。綠幘亡其道濟。嗟乎揚州歌舞之場。雷塘羅綺之地。  
。一旦烟空。千秋景異。馬嘶隋柳之風。蜃吐海門之氣。潮上廣  
陵而寂寞。枝發瓊花雨惟悴。鉅鹿沙崩。長平瓦碎。猓榆相臨。蛟

鮫俱退。鬼有曹社之謀。天同鶉首之醉。擄槍空鐵甕之城。弧矢落金山之壘。天子蒙塵。將軍仗義。軹道降王。長安舊帝。朱組輿櫬之羞。青衣行櫬之隸。白日蒼茫。黃雲迢遞。燕姬之錦瑟新調。代馬之丹鬣乍繫。元武池邊。景陽宮裏。莫愁之歌舞何如。長樂之鼓鐘已矣。斜陽歸而燕子秋飛。蔓草平而後湖月起。秦淮則一點青烟。桃葉則三聲漁市。麤燕徧於故宮。莓苔碧於舊內。平康之絕巷雞鳴。鍾嶺之空山鶴唳。風塵蕭索兮十二樓。烟雨淒迷兮四百寺。烏啼上苑之花。鵲噪孝園之樹。故老吞聲。行人隕涕。殷王子麥秀之歌。周大夫黍離之淚。天地何心。河山奚罪。若夫龍種困而被奴。鸚儀降而爲婢。逐燕支而上馳。抱琵琶而北去。



。黑山之月年年。青冢之花歲歲。室處有口毒之口。口髮有口口  
之累。於是竿水羣興。風雲畢會。興六月之師。振九天之銳。橫  
海伏波。戈船下瀨。軌亡秦之陳勝。效安劉之翟義。誅殷通於戲  
下。斬甄阜於帳外。青雀烟騰。黃龍雲邁。夸父有投杖之心。魯  
陽無挽戈之計。兵弱夷強。地柔人脆。傷心夫王子白衣。絕望於  
將軍蒲類。田橫之五百軍人。項籍之八千子弟。平陵東而黃犢可  
賣。大澤左而烏雉不逝。天蕭蕭兮不明。日荒荒其欲曠。傷兩鎮  
之未旋。痛孤城之已潰。聞楚歌則部曲蕭條。聽胡笳則征夫歔歔  
。國殤怨而陰雨深。戰鬼哭而愁颺厲。烟草依然。江湖如是。毅  
魄歸來。靈風涕泗。至若江關不見。鄉國何方。坑既酷於新安。

火復烈於咸陽。谷水無浮雲之使。崑山非行雨之鄉。姑蘇烽火。攜李蕪荒。草入語兒之館。月明響牒之廊。美人則紫台黃土。英雄則白草青霜。風何爲而慘慘。雲何地而茫茫。招魂兮春蘭秋菊。弔古兮山高水長。悴瓊枝而無色。零瑤草兮不芳。陵谷變遷。松柏荒涼。景光黯黯兮銷魂。烟波漠漠兮斷腸。夜不寐而耿耿。淚沾襟而浪浪。何日度鶯花之月。何年歸玳瑁之梁。燕朝枯柳。蝶舞空牆。爐頭無小婦之酒。城東非少年之場。舊遊零謝。獨壘荒涼。歸去則杜鵑啼月。力微則精衛填江。況夫國屯家難。先子云亡。訪彭咸於藥室。從墨允於首陽。留遺孤於廬堊。曾仗劍於成行。濟雲帆之無路。匿土室而自傷。王章之牛衣空臥。馬卿之犢

鼻頰穿。王尼之車長宿。范曄之麝空懸。任西華單衣見肘。孫叔敖餒鬼誰田。弱齡則海籌十六。短髮則霜鏡三千。惟我生之不辰。丁窮酷之蒼天。若乃天南鼎定。澗右龍騫。劉文叔南陽白水。越勾踐采葛飛鴛。乾坤重照。日月雙懸。湖中賈勇。內地爭先。司馬秉中軍之鉞。虞人司上將之權。三吳漁獵。七郡烽烟。扁舟勢疾。三鼓氣堅。余乃飄搖澤國。躑躅行間。飲君親之夙恨。鬱國家之煩冤。短衣則東州亡命。長戟則西掖備員。既有志於兔胄。豈無心於喪元。伍大夫昭關馬渡。張留侯滄海龍潛。紈綺非封侯之骨。漁樵當用武之年。千里之月明鼓角。五湖之春泛樓船。魚龍蟠於甲帳。裘馬壯於戈鋌。錦氍毹三軍高宴。金叵羅諸將扣舷。

○既充下乘。敢託中涓。草檄則遠愧孔璋。入幕則深慚仲宣。濤寒震澤。風厲由拳。秦帝之椎未中。楚王之墓之誰鞭。時無文范。人乏策權。龍衣逝矣。魚腹困焉。吳明徹之功名何在。秦舞陽之拳勇堪憐。吳要離矛因風轉。楚龔勝膏以明煎。高漸離之筑聲往矣。徐夫人之匕首依然。亡楚之功不就。報韓之志何傳。兼以五馬則寡君雲夢。六龍則天王翟泉。三戶亡秦之讖。九歌哀郢之篇。功成婚芋。名假蘇燕。義公既刼。壯夫不還。王褒則蓼莪三廢。夏馥則傭保十年。入林自愧夫介推。蹈海深慚於魯連。管寧皂帽。箕子朝鮮。烟斷營門之柳。霜凋幕府之蓮。國亡家破。軍敗身全。招魂而湘江有淚。從軍則蜀國無絃。哀哉欲絕。已矣何言。

○嗚呼。余生於烈皇之朝。長於聖安之世。佐威虜以于征。從長興而再起。追懷故君。何感何否。言念舊臣。何功何罪。或盱食而宵衣。或墮簪而遺珥。或麥飯以自嘗。或肉糜之堪恥。推本先朝。追原禍始。神宗之垂拱不朝。熹廟之委裘而理。罪莫熾於趙高。害莫深夫褒姒。惟屈鞫之下獄。與朱浮之賜死。雖大臣之無刑。非聖人之得已。至於五世偏安。三朝舊事。指觸瑟爲貞規。斥采芝爲佞軌。使口口之北風。陷泥塗於南紀。殷深源之方略空。王夷甫之風流爾爾。若乃威虜偏裨。長興文吏。原非將帥之材。未有公侯之器。興懷鴻鵠之言。頗見龍蛇之志。日日胡床之臥。夜夜釣天之醉。旣一戰之未申。淪九死而靡悔。黃土一坏。

丹青萬禩。余草木門庭。旂常家世。家淑人黃鵠之悲。先文忠白虹之氣。非無德曜之妻。尙有文姬之姊。衣冠列於杜曲。姓氏通夫槐里。寄食無鄉。望塵有地。范丹之甑長寒。卞彬之蟲未棄。達士窮途之悲。壯夫歧路之淚。載念簪纓。言懷邦國。恨欲言而聲已吞。愁將訴而淚沾臆。何必雍門之琴。無假武陵之笛。日月如流。親朋不識。獨劍空囊。三江浪跡。人容鼓吏之狂。世笑愚公之癖。混緇羽之高賢。結屠蕭之豪客。三桑無再浴之期。一飯有千金之值。望舊鄉而雲影蒼蒼。弔故壘而風聲惻惻。蔣詡之徑不聞。王猶之舟時出。秋水迢遙。寒林蕭瑟。野獸暮號。群鶴晚集。鶴唳霜清。鷗眠月直。過耳傷神。仰天太息。山氣兮江光。

春陽兮秋色。嫋姚空舊築之壇。郎將有先暗之戟。蛟龍非遇雨之期。鯤鵬無御風之力。韓王孫之城下。知己誰人。宋如意之堂前。傷心何極。下江但見夫綠林。圯橋未逢其黃石。此孤臣所以輟食而拊心。枕戈而於邑者也。

哀江南賦

並序

庾信

粵以戊辰之年。建亥之月。大盜移國。金陵瓦解。余乃竄身荒谷。公私塗炭。華陽奔命。有去無歸。中興道銷。窮於甲戌。三日哭於都亭。三年囚於別館。天道周星。物極不反。傅燮之但悲身世。無處求生。袁安之每念王室。自然流涕。昔桓君山之志事。杜元凱之平生。並有著書。咸能自序。潘岳之文彩。始述家風。陸

機之辭賦。先陳世德。信年始二毛。即逢喪亂。藐是流離。至於暮齒。燕歌遠別。悲不自勝。楚老相逢。泣將何及。畏南山之雨。忽踐秦庭。讓東海之濱。遂餐周粟。下亭漂泊。高橋羈旅。楚歌非取樂之方。魯酒無忘憂之用。追爲此賦。聊以紀言。不無危苦之辭。唯以悲哀爲主。日暮途遠。人閒何世。將軍一去。大樹飄零。壯士不還。寒風蕭瑟。荆璧睨柱。受連城而見欺。載書橫階。捧珠盤而不定。鍾儀君子。入就南冠之囚。季孫行人。留守西河之館。申包胥之頓地。碎之以首。蔡威公之淚盡。加之以血。釣臺移柳。非玉關之可望。亭華鶴唳。豈河橋之可聞。孫策以天下爲三分。衆纔一旅。項籍用江東之子弟。人惟八千。遂乃分裂



山河。宰割天下。豈有百萬義師。一朝捲甲。芟蕘斬伐。如草木焉。江淮無涯岸之阻。亭壁無藩籬之固。頭會箕歛者。合從締交。鋤耨棘矜者。因利乘便。將非江表王氣。終於三百年乎！是知并吞六合。不免軹道之災。混一車書。無救平陽之禍。嗚呼。山岳崩頽。既履危亡之運。春秋迭代。必有去故之悲。天意人事。可以悽愴傷心者矣！况復舟楫路窮。星漢非乘槎可上。風飈道阻。蓬萊無可到之期。窮者欲達其言。勞者須歌其事。陸士衡聞而撫掌。是所甘心。張平子見而陋之。固其宜矣。

我之掌庾承周。以世功而爲族。經邦佐漢。用論道而當官。稟嵩華之玉石。潤河洛之波瀾。居負洛而重世。邑臨河而晏安。逮永

嘉之艱虞。始中原之乏主。民枕倚於牆壁。路交橫於豺虎。值五馬之南奔。逢三星之東聚。彼凌江而建國。始播遷於吾祖。分南陽而賜田。裂東嶽而胙土。誅茅宋玉之宅。穿徑臨江之府。水木交運。山川崩竭。家有直道。人多全節。訓子見於滄深。事君彰於義烈。新野有生祠之廟。河南有胡書之碣。况乃少微真人。天山逸民。階庭空谷。門巷蒲輪。移譚講樹。就簡書筠。降生世德。載誕貞臣。文詞高於甲觀。模楷盛於漳濱。嗟有道而無鳳。嘆非時而有麟。既奸回之變逆。終不悅於仁人。王子賓洛之歲。蘭成射策之年。始含香於建禮。仍矯翼於崇賢。游游雷之講肆。齒明離之胄筵。既傾蠡而酌海。遂測管以窺天。方塘水白。釣渚池

圓。待戍韜於武帳。聽雅曲於文弦。乃解懸而通籍。遂崇文而會武。居笠轂而掌兵。出蘭池而典午。論兵於江漢之君。抵玉於西河之主。於時朝野歡娛。池臺鐘鼓。里爲冠蓋。門成鄒魯。連茂苑於海陵。跨橫塘於江浦。東門則鞭石成橋。南極則鑄銅爲柱。橘則園植萬株。竹則家封千戶。西書浮玉。南琛沒羽。吳歆越吟。荆豔楚舞。草木之遇陽春。魚龍之逢風雨。五十年中。江表無事。王歆爲和親之侯。班超爲定遠之使。馬武無預於甲兵。馮唐不譚於將帥。豈知山嶽闐然。江湖潛沸。漁陽有閭左戍卒。離石有論兵都尉。天子方刪詩書。定禮樂。設重雲之講。開士林之學。譚刦燼之灰飛。辨常星之夜落。地平魚齒。城危獸角。臥刁斗於

榮陽。絆龍媒於平樂。宰衡以干戈爲兒戲。搢紳以清談爲廟略。乘漬水以膠船。馭奔駒以朽索。小人則將及水火。君子則方成猿鶴。敝策不能救鹽池之鹹。阿膠不能止黃河之濁。旣而魴魚頰尾。四郊多壘。殿狎江鷗。宮鳴野雉。湛盧去國。懸腥失水。見被髮於伊川。知百年而爲戎矣。被奸逆之熾盛。久遊魂而放命。大則有鯨有鯢。小則爲梟爲獍。負其牛羊之力。凶其水草之性。非玉燭之能調。豈璿璣之可正。值天下之無爲。尙有欲於羈縻。飲其琉璃之酒。賞其虎豹之皮。見胡柯之大夏。識鳥卵於條枝。豺牙宓厲。虺毒潛吹。輕九鼎而欲問。聞三川而遂窺。始則王子召戍。姦臣介冑。旣官政而離逖。遂師言而泄漏。望廷尉之逋囚。反

淮南之窮寇。出狄泉之蒼鳥。起橫江之困獸。地則石鼓鳴山。天則金精動宿。北闕龍吟。東陵麟鬥。爾乃黠桀橫扇。馮陵畿甸。擁狼望則望於黃圖。填廬山於赤縣。青袍如草。白馬如練。天子履端廢朝。單于長圍高宴。兩觀當戟。千門受箭。白虹貫日。蒼鷹擊殿。竟遭夏臺之禍。終視堯城之變。官守無奔問之人。干戚非平戎之戰。陶侃空爭米船。顧榮虛搖羽扇。將軍死綏。路絕重圍。烽隨星落。書逐鳶飛。遂乃韓分趙裂。鼓臥旗折。失羣班馬。迷輪亂轍。猛士嬰城。謀臣卷舌。昆陽之戰象走林。常山之陣蛇奔穴。五郡則兄弟相悲。三州則父子離別。護軍慷慨。忠能死節。三世爲將。終於此滅。濟陽忠壯。身參末將。兄弟三人。義聲

俱唱。主辱臣死。名存身喪。狄人歸元。三軍悽愴。尙書多算。  
守備是長。雲梯可拒。地道能防。有齊將之閉壁。無燕師之臥牆。  
。大事去矣。人之云亡。申子奮發。勇氣咆勃。實總元戎。身先  
士卒。胃落魚門。兵填馬窟。屢犯通中。頻遭刮骨。功業天枉。  
身名埋沒。或以隼翼鷙披。虎威狐假。沾漬鋒鏑。脂膏原野。兵  
弱虜強。城孤氣寡。聞鶴唳而心驚。聽胡笳而淚下。據神亭而亡  
戟。臨橫江而棄馬。崩於鉅鹿之沙。碎於長平之瓦。於是桂林顛  
覆。長洲麋鹿。潰潰沸騰。茫茫慘黷。天地離阻。人神慘酷。晉  
鄭靡依。魯衛不睦。競動天關。爭迴地軸。探雀穀而未飽。待熊  
蹯而詎熟。乃有車側郭門。筋懸廟屋。鬼同曹社之謀。人有秦庭

之哭。爾乃假刻璽於關塞。稱使者之酬對。逢鄂坂之譏嫌。值彰  
門之征稅。乘白。而不前。策青驪而轉礙。吹落葉之扁舟。飄長  
風於上游。彼鋸牙而鉤爪。又循江而習流。排青龍之戰艦。鬥飛  
鸞之船樓。張遼臨於赤壁。王濬下於巴邱。乍風驚而射火。或箭  
重而回舟。未辨聲於黃蓋。已先沈於杜侯。落帆黃鶴之浦。藏船  
鸚鵡之洲。路已分於湘漢。星猶看於斗牛。若乃陰陵失路。釣臺  
斜趣。望赤壁而沾衣。躑鳥江而不渡。雷池柵浦。鵲陵焚戍。旅  
舍無烟。巢禽無樹。謂荆衡之杞梓。庶江漢之可恃。淮海維揚。  
三千餘里。過漂渚而寄食。託蘆中而渡水。屈於七澤。濱於十死。  
嗟天保之未定。見殷憂之方始。本不達於危行。又無情於祿仕。

。謬掌衛於中軍。濫尸承於御史。信生世等於龍門。辭親同於河洛。奉立身之遺訓。受承書之顧託。昔三世而無慚。今七葉而方落。泣風雨於梁山。惟枯魚之銜索。入崎斜之小徑。掩蓬翟之荒扉。就汀洲之杜若。待蘆葦之單衣。於時西楚霸王。劍及繁陽。鑿兵金匱。較戰玉堂。蒼鷹赤雀。鐵軸牙檣。沈白馬而誓衆。負黃龍而渡江。海潮迎艦。江萍送王。戍車屯於石城。戈船掩於淮泗。諸侯則鄭伯前驅。盟主則荀罃暮至。剖巢熏穴。奔魍走魅。埋長狄於駒門。斬蚩尤於中冀。燃腹爲燈。飲頭爲器。直虹貫壘。長星屬地。昔之虎踞龍盤。加以黃旗紫氣。莫不隨狐兔而窟穴。與風塵而殄瘁。西瞻博望。北臨玄圃。月榭風臺。池平樹古。



倚弓於玉女窗扉。繫馬於鳳凰樓柱。仁壽之鏡徒懸。茂陵之書空聚。若夫立德立言。謨明寅亮。聲超於繫表。道高於河上。更不遇於浮邱。遂無言於師曠。以愛子而託人。知西陵而誰望。非無北闕之兵。猶有靈臺之仗。司徒之表裏經綸。狐偃之惟王實勤。王橫瑠戈而對霸主。執金鼓而問賊臣。平吳之功。壯於杜元凱。王室是賴。深於溫太真。始則地名全節。終則山稱枉人。南陽校書。去之已遠。上蔡逐獺。知之何晚。鎮北之負譽矜前。風颺懍然。水神遭箭。山靈見鞭。是以螫熊傷馬。浮蛟沒船。才子併命。俱非百年。中宗之夷凶靜亂。大雪冤恥。去代邸而承綦。遷唐郊而纂祀。反舊章於司隸。歸餘風於正始。沈猜則方逞其欲。藏疾

則自矜於已。天下之事沒焉。諸侯之心搖矣。既而齊交北絕。秦患西起。况背關而懷楚。異端委而開吳。驅綠林之散卒。拒驪山之叛徒。營軍梁涿。蒐乘巴渝。問諸淫昏之鬼。求諸厭劾之符。荆門遭廩延之戮。夏口濫逵泉之誅。蔑因親以教愛。忍和樂於彎弧。既無謀於肉食。非所望於論都。未深思於五雞。先自擅於三端。登陽城而避險。臥砥柱而求安。既言多於忌刻。實志勇而形殘。但坐觀於時變。本無情於急難。地惟黑子。城猶彈丸。其怨則顯。其盟則寒。豈冤禽之能塞海。非愚叟之可移山。况以沴氣朝浮。妖精夜殞。赤鳥則三朝夾日。蒼雲則七重圍軫。亡吳之歲既窮。入郢之年斯盡。周含鄭怒。楚結秦冤。有南風之不競。值西

鄰之責言。俄而梯衝亂舞。冀馬雲屯。餞秦車於暢轂。沓漢鼓於雷門。下陳倉而連弩。渡臨晉而橫船。雖復楚有七澤。人稱三戶。箭不麗於六麋。雷無驚於九虎。辭洞庭兮落木。去岑陽兮極浦。熾火兮焚旗。貞風兮害蠱。乃使玉軸揚灰。龍文折柱。下江餘城。長林故營。徒思措馬之秣。未見燒牛之兵。章曼支以轂走。宮之奇以族行。河無兵而馬渡。關未曉而雞鳴。忠臣解骨。君子吞聲。章華望祭之所。雲夢僞遊之地。荒谷縊於莫敖。冶父囚於羣帥。礪谷摺拉。鷹鷗批攢。冤霜夏零。憤泉秋沸。城崩杞婦之哭。竹染湘妃之淚。水毒秦涇。山高趙陘。十里五里。長亭短亭。饑隨蟄鷲。暗逐流螢。秦中水黑。關上泥青。於時瓦解冰判。

風飛電散。渾然千里。淄澠一亂。雪暗如沙。冰橫似岸。逢赴洛之陸機。見離家之王粲。莫不聞隴水而掩泣。向關山而長歎。况復君在交河。妾在清波。石望夫而逾遠。山望子而逾多。才人之憶代郡。公主之去清河。栩陽亭有離別之賦。臨江王有愁思之歌。別有飄飄武威。羈旅金微。班超生而望返。溫序死而思歸。李陵之雙鳧永去。蘇武之一雁空飛。若江陵之中否。乃金陵之禍始。雖借人之外力。實蕭牆之內起。撥亂之主忽焉。中興之宗不祀。伯兮叔兮。同見戮於猶子。荆山鵲飛而玉碎。隋岸虵生而珠死。鬼火亂於平林。殤魂游於新市。梁固豐徙。楚實秦亡。不有所廢。其何以昌。有媯之後。將育於姜。輸我神器。居爲讓王。天

地之大德曰生。聖人之大寶曰位。用無賴之子弟。舉江東而全棄。惜天下之一家。遭東南之反氣。以鶉首而賜秦。天何爲而此醉。且夫天道迴旋。生民預焉。余列祖於西晉。始流播於東川。泊余身而七葉。又遭時而北遷。提挈老幼。關河累年。死生契闊。不可問天。况復零落將盡。靈光歸然。日窮於紀。歲將復始。逼迫危慮。端憂暮齒。踐長樂之神皋。望宣平之貴里。渭水貫於天門。驪山迴於地市。幕府大將軍之愛客。丞相平津侯之待士。見鐘鼎於金張。聞絃歌於許史。豈知灞陵夜獵。猶是故時將軍。咸陽布衣。非獨思歸王子。

書

書

復攝政睿親王書

明史可法

南中向接好音。法隨遣使問訊吳大將軍。未敢遽通左右。非委隆誼於草莽也。誠以大夫無私交。春秋之義。今倥傯之際。忽捧琬琰之章。真不啻從天而降也。循讀再三。殷殷至意。若以逆賊尙稽天討。煩貴國憂。法且感且愧。懼左右不察。謂南中臣民。媿安江左。竟忘君父之怨。敬爲貴國一詳陳之。我大行皇帝 敬天法租。勤政愛民。真堯舜之主也。以庸臣誤國。致有三月十九日之事。法待罪南樞。救援無及。師次淮上。凶問遂來。地坼天崩。山枯海泣。嗟乎！人孰無君。雖肆法於市朝。以爲泄泄者之戒。亦奚足謝先皇帝於地下哉。爾時南中臣民。哀慟如喪考妣。無不拊

膺切齒。欲悉東南之甲。立翦兇仇。而二三老臣。謂國破君亡。宗社爲重。相與迎立今上。以繫中外之心。今上非他。神宗之孫。光宗猶子。而大行皇帝之兄也。名正言順。天與人歸。五月朔日。駕臨南都。萬姓夾道歡呼。聲聞數里。羣臣勸進。今上悲不自勝。讓再讓三。僅允監國。迨臣民伏闕屢請。始以十五日正位南都。從前鳳集河清。瑞應非一。即告廟之日。紫雲如蓋。祝文升霄。萬目共瞻。欣傳盛事。大江湧出枏梓數十萬章。助修宮殿。豈非天意也哉。越數日。遂命法視師江北。刻日西征。忽傳我大將吳三桂。借兵貴國。破走逆成。爲我先皇帝后。發喪成禮。掃清宮闕。撫輯羣黎。且罷薙髮之令。示不忘本朝。此等舉動。

振古鑠今。凡爲大明臣子。無不長臨北向。頂禮加額。豈但如明諭所云。感恩圖報已乎。謹於八月。薄治筐篚。遣使犒師。兼欲請命鴻裁。運兵西討。是以主師旣發。復次江淮。乃辱明誨。引春秋大義。來相詰責。善哉乎推言之。然此文爲列國君薨。世子應立。有賊未討。不忍死其君者立說耳。若夫天下共主。身殉社稷。青宮皇子。慘變非常。而猶拘牽不即位之文。坐昧大一統之義。中原鼎沸。倉卒出師。將何以維繫人心。號召忠義。紫陽綱目。踵事春秋。其間特書。如莽移漢鼎。光武中興。丕廢山陽。昭烈踐祚懷。愍亡國。晉元嗣基。徽欽蒙塵。宋高續統。是皆於國讎未翦之日。亟正位號。綱目未嘗斥爲自立。率以正統予之。甚至



於玄宗幸蜀。太子即位靈武。議者庇之。亦未嘗不許以行權。幸其光復舊物也。本朝傳世十六。正統相承。自治冠帶之族。繼絕存亡。仁思遐被。貴國昔在先朝。夙膺封號。載在盟府。寧不聞乎。今痛心本朝之難。驅除亂逆。可謂大義復著於春秋矣。昔契丹和宋。止歲輸以金繒。回紇助唐。原不利其土地。况貴國篤念世好。兵以義動。萬代瞻仰。在此一舉。若乃乘我蒙難。樂奸崇讎。規此幅員。爲德不卒。是以義始而以利終。爲賊人所笑也。貴國豈其然。往先帝軫念潢池。不忍盡戮。勦撫互用。貽誤至今。今上天縱英明。刻刻以復仇爲念。廟堂之上。和衷體國。介冑之士。飲泣枕戈。忠義民兵。願爲國死。竊以爲天亡逆闖。當不

越於斯時矣。語曰：「樹德務滋。除惡務盡。」今逆成未服天誅。諜知捲土西秦。方圖報復。此不獨本朝不共戴天之恨。抑亦貴國除惡未盡之憂。伏乞堅同讎之誼。全始終之德。合師進討。問罪秦中。共梟逆賊之頭。以洩敷天之憤。則貴國義問。炤耀千秋。本朝圖報。惟力是視。從此兩國世通盟好。傳之無窮。不亦休乎。至於牛耳之盟。則本朝使臣。久矣在道。不日抵燕。奉盤盂從事矣。法北望陵廟。無涕可揮。身蹈大戮。罪應萬死。所以不即從先帝者。實爲社稷之故。傳曰：「竭股肱之力。繼之以忠貞。」法處今日。鞠躬致命。克盡臣節。所以報也。惟殿下實昭鑒之。

拒馬士英書

王思任

閣下文彩風流。素所嚮慕。當國破衆疑之際。擁立新君。閣下輒  
驕氣滿腹。政本自由。兵權在握。乃不講戰守之事。而但以聲色  
逢君。門戶黨錮。以致人心解體。士氣不揚。叛兵至則束手無策  
。強敵來則望風先遁。致令乘輿播越。社稷邱墟。覩此茫茫。誰  
執其咎。余爲閣下計。莫如明水一盃。自刎以謝天下。則忠憤之  
士。尙可相原。若但求全首領。亦當立解兵權。授之守正大臣。  
呼天搶地。以招豪傑。今乃逍遙江上。效賈似道之故轍。人笑褚  
淵。齒已冷矣。且欲求奔吳越。夫吳越乃報仇雪恥之國。非藏垢  
納汙之地也。吾當先赴胥濤。乞素車白馬。以拒閣下。

## 序

張中丞傳後序

唐韓愈

元和二年四月十三日夜。愈與吳郡張籍。閱家中舊書。得李翰所爲張巡傳。翰以文章自名。爲此傳頗詳密。然尙恨有闕者。不爲許遠立傳。又不載雷萬春事首尾。遠雖材若不及巡者。開門納巡。位本在巡上。授之柄而處其下。無所疑忌。竟與巡俱守死。成功名。城陷而虜。與巡死先後異耳。兩家子弟材智下。不能通知二父志。以爲巡死而遠就虜。疑畏死而辭服於賊。遠誠畏死。何苦守尺寸之地。食其所愛之肉。以與賊抗而不降乎。當其圍守時。外無蚍蜉蟻子之援。所欲忠者國與主耳。而賊語以國亡主滅。遠見救援不至。而賊來益衆。必以其言爲信。外無待而猶死守。

人相食且盡。雖愚人亦能數日而知死處矣。遠之不畏死亦明矣。烏有城壞。其徒俱死。獨蒙媿恥求活。雖至愚者不忍爲。嗚呼而遠之賢而爲之耶。說者又謂遠與廵分城而守。城之陷。自遠所分始。以此詬遠。此而與兒童之見無異。人之將死。其臟腑必有先受其病者。引繩而絕之。其絕必有處。觀者見其然。從而尤之。其亦不達於理矣。小人之好議論。不樂成人之美如是哉。如廵遠之所成就。如此卓卓。猶不得免。其他則又何說。當二公之初守也。寧能知人之卒不救。棄城而逆遁。苟此不能守。雖避之他處何益。及其無救而且窮也。將其創殘餓羸之餘。雖欲去。必不達。二公之賢。其講之精矣。守一城捍天下。以千百就盡之卒。戰

百萬日滋之師。蔽遮江淮。沮遏其勢。天下之不亡。其誰之功也。當是時棄城而圖存者。不可一二數。擅強兵坐而觀者相環也。不追議此。而責二公以死守。亦見其自比於逆亂。設淫辭而助之攻也。愈從當事於汴徐二府。屢道於兩府間。親祭其所謂雙廟者。老人往往說巡遠時事；云南霽雲之乞救於賀蘭也。賀蘭嫉巡遠之聲威功績出己上。不肯出師救；愛霽雲之勇且壯。不聽其語。強留之；且食與樂。延霽雲坐。霽雲慷慨語曰：雲來時睢陽之人。不食月餘日矣。雲雖欲獨食。義不忍。雖食且下咽。因拔所佩刀。斷一指。血淋漓以示賀蘭。一座大驚。皆感激爲雲泣下。雲知賀蘭終無爲雲出師意。即馳去。將出城。抽矢射佛寺浮圖。

矢著其上。輒半箭。曰：吾歸破賊。必滅賀蘭。此矢所以志也。愈貞元中。過泗洲。船上人猶指以相語。城陷。賊以刃脅降巡。巡不屈。即牽去。將斬之。又降霽雲。雲未應。巡呼雲曰。南八。男兒死耳。不可爲不義屈。雲笑曰。欲將以有爲也。公有言。雲敢不死。即不屈。張籍曰。有于嵩者。少依於巡。及巡起事。嵩常在圍中。籍大歷中。於和州烏江縣見嵩。嵩時年六十餘矣。以巡初嘗得臨渙縣尉。好學無所不讀。籍時尙小。粗問巡遠事。不能細也。云：巡長七尺餘。鬚髯若神。嘗見嵩讀漢書。謂嵩曰。何爲久讀此？嵩曰。未熟也。巡曰。吾於書讀不過三遍。終身不忘也。因誦嵩所讀書。盡卷不錯一字。嵩驚以爲巡偶熟此卷。因

亂抽他帙以試。無不盡然。嵩又取架上諸書。試以問巡。巡應口誦無疑。嵩從巡久。亦不見巡常讀書也。爲文章。操紙筆立書。未嘗起草。初守睢陽時。士卒僅萬人。城中居人。戶亦且數萬。巡因一見問姓名。其後無不識者。巡怒。鬚髯輒張。及城陷。賊縛巡等數十人。坐。且將戮。巡起旋。其衆見巡起。或起或泣。巡曰：汝勿怖。死命也。衆泣不能仰視。巡就戮時。顏色不亂。陽陽如平常。遠寬厚長者。貌如其心。與巡同年生。月日後於巡。呼巡爲兄。死時年四十九。嵩貞元初。死於亳宋間。或傳嵩有田在亳宋間。武人奪而有之。嵩將詣州訟理。爲所殺。嵩無子。張籍云。



中華民國二十三年四月二十日付印  
中華民國二十三年五月一日出版

國 難 文 學 (第二編)

每册定價大洋貳角  
郵票代價不折不扣

版 權 不 准 翻 印  
所 有 權 不 准 翻 印

著 者 吳 貫 因  
出 版 者 東 北 問 題 研 究 會  
發 行 者 東 北 問 題 研 究 會  
印 刷 者 外 交 月 報 印 刷 所

總代售處

北平府右街運料門裏中海寶光門外交月報社經理部

分代售處

北平中華，新生命，現代，佩文齋，聯合，歧山，湖風，景華，新智，新華，華盛等各書局及天津上海大公報代辦部

「外交月報」為國內研究外交之唯一定期刊物，糾合海內外國際法及各項專家五十餘人，擔任撰稿，每月出版一冊。自七月創刊以來，頗蒙社會贊許，國內重要報紙如大公報北平晨報，均有良好批評，凡留心外交問題，及世界情勢者，不可不長期定閱！

外交月報定價表			
每月一冊		全年十二冊	
零售每冊大洋四角、國外五角、特號另定、郵資在內、			
定	半年六冊	國內	壹圓伍角
	全年十二冊	國外	貳圓伍角
預	半年六冊	國內	壹圓
	全年十二冊	國外	伍圓
香港澳門及日本均照國內郵票代價不折不扣但以一角以內者為限			

總發行所

北平府右街運料門裏外交月報社經理部

代售處

北平景華書社，現代書局，華北日報代辦部，朔風書店，佩文齋，景華書社，新華書社，聯合書店，新智書局，歧山書社，新漸書店，景山書社，天津天津書局，漢口生活書店，南京：正中書局，漢口現代書局，廈門開明書局，南鄭大公報分館，天津上海大公報代辦部，及各省市大書坊